

ათი _ თერთმეტის წინააღმდეგ

მოსოვის “ლოკომოტივისა” და თბილისის “დინამოს” ფეხბურთელთა გუნდების კალენდარული მატჩი, რომელიც გუშინ ლ. პ. ბერიას სახელობის თბილისის “დინამოს” სტადიონზე ჩატარდა, მეტად საინტერესო გამოდგა. თამაშის დაწყებისას გუნდები თითქოს სინჯავდნენ ერთმანეთს. დიდხანს უპირატესობა ვერც ერთმა ვერ ჩაიგდო ხელში. ამან გაანერვიულა მოთამაშეები და უხეშობა დაიწყო. ამის შედეგად თბილისის მარჯვენა გარემარბი ჯოჯუა მსაჯმა გააძევა მინდვრიდან. სტუმრებმა ამით ისარგებლეს და დინამოელებს მარცხენა ფრთიდან შეუტყეს, მაგრამ თბილისელთა კარს ერთგულად იცავდნენ ვ. ელოშვილი, მ. ჭელიძე, ი. სარჯველაძე. ვ. მარღანიამ “მკვდარი” ბურთი აიღო.

მეორე ტაიმი გაცხოველებული ბრძოლით აღინიშნა. თბილისელებმა რიცხოვრივი სიმცირის მიუხედავად აქტიურად შეუტყეს სტუმრებს. თავდასხმის მიერ გათამაშებულ კომბინაციებში რიგრიგობით დამცველებიც მონაწილეობდნენ. ერთი ასეთი შეტევისას ვ. ელოშვილი შეიჭრა მოწინააღმდეგის საჯარიმო მოედანზე. მოსკოველი დამცველი ოსიპოვი ბურთს ხელით შეეხო, თერთმეტმეტრიანი საჯარიმო დარტყმა ლოღობერიძემ შესანიშნავად გამოიყენა და ანგარიში გახსნა. ეს ბურთი გადამწყვეტი გამოდგა.

“დინამომ” ეს მატჩი დამსახურებულად მოიგო.

ბ. ქორქია.

“ახალგაზრდა კომუნისტი”, 8 ოქტომბერი, 1949 წ.